



SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka („Službeni glasnik BiH“, broj: 95/12 i 41/16), člana 25. Pravilnika o godišnjim finansijskim izvještajima političkih stranaka („Službeni glasnik BiH“, broj: 96/13, 89/1, 5/22 i 31/24) i člana 12. Pravilnika o administrativnim procedurama pregleda, kontrole i revizije finansijskih izvještaja političkih stranaka („Službeni glasnik BiH“, broj: 103/08, 5/22 i 39/25), izdajem

IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2022. GODINU SAVEZA MLADIH SNAGA

Broj: 03-07-6-478/23
Sarajevo, 05.12.2025. godine

S A D R Ź A J

MIŠLJENJE REVIZORA.....	3
1. UVOD.....	4
2. PREDSTAVLJANJE POLITIČKE STRANKE.....	4
3. OPIS PREGLEDA I KONTROLE FINANSIJSKOG IZVJEŠTAJA	5
Predmet pregleda i kontrole.....	5
Cilj pregleda i kontrole	5
Obim pregleda i kontrole.....	5
4. PRETHODNE KONTROLE I REVIZIJE.....	5
5. NALAZI I PREPORUKE.....	5
5.1 NALAZI.....	5
5.2 PREPORUKE	9

MIŠLJENJE REVIZORA

Služba za reviziju finansiranja političkih stranaka izvršila je pregled godišnjeg finansijskog izvještaja Saveza mladih snaga za 2022. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Općih izbora, održanih 2022. godine.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka i odredbama poglavlja 15 Izbornog zakona Bosne i Hercegovine, te uspostavljanje efikasnog sistema internih kontrola.

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskih izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

Pregledom godišnjeg finansijskog izvještaja za 2022. godinu, utvrđeno je da je Savez mladih snaga prekršio odredbe člana 4. stav (1), člana 8. stav (1), člana 11. stav (1) i člana 12. stav (1), stav (3), stav (4) i stav (5) Zakona o finansiranju političkih stranaka i člana 15.1 stav (1) Izbornog zakona Bosne i Hercegovine.

Na osnovu našeg pregleda, odnosno kontrole finansijskih izvještaja, osim gornje napomene, nismo zapazili ništa značajno što bi ukazalo na nedostatke u finansijskom izvještaju ili na finansiranje ove političke stranke suprotno odredbama Zakona o finansiranju političkih stranaka niti na finansiranje troškova izborne kampanje suprotno odredbama člana 15.10 Izbornog zakona Bosne i Hercegovine.

1. UVOD

Služba za reviziju finansiranja političkih stranaka (u daljem tekstu: Služba za reviziju) izvršila je pregled godišnjeg finansijskog izvještaja Saveza mladih snaga za 2022. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Općih izbora, održanih 2022. godine.

Pregled i kontrola finansijskih izvještaja provedeni su u skladu sa članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja za 2022. godinu, Savez mladih snaga se finansirao iz sljedećih izvora:

R/B	Izvori finansiranja	Iznos (KM)	Struktura (%)
1.	Članarina	0,00	0,00
2.	Prilozi fizičkih lica (3-a)	0,00	0,00
3.	Prilozi pravnih lica (3-b)	0,00	0,00
4.	Prihodi od imovine (3-c)	0,00	0,00
5.	Prihodi od dobiti preduzeća u vlasništvu političke stranke (3-d)	0,00	0,00
6.	Prihodi od poklona (3-e)	0,00	0,00
7.	Prihodi iz budžeta (3-f)	27.171,90	100,00
8.	Prihodi od propagande (3-g)	0,00	0,00
I	Ukupni prihodi (1-8)	27.171,90	100,00
II	Ostali prihodi i drugo	0,00	0,00
	Izvori finansiranja (I+II)	27.171,90	100,00

U godišnjem finansijskom izvještaju politička stranka je iskazala rashode u ukupnom iznosu od 30.292,13 KM.

2. PREDSTAVLJANJE POLITIČKE STRANKE

Naziv političke stranke je Savez mladih snaga. Skraćeni naziv stranke je SMS.

Savez mladih snaga je registrovan kod Općinskog suda u Sarajevu, Rješenjem broj: 065-0-F1-18000007 od 08.05.2018. godine, sa sjedištem u ulici Baruthana broj 63, Sarajevo, koga zastupa predsjednik stranke Vedad Jašarević.

Rješenjem Općinskog suda u Sarajevu broj: 065-0-F1-23-000001 od 07.06.2023. godine upisano je novo sjedište Saveza mladih snaga u ulici Ablagijin sokak 57, Sarajevo i promjena predsjednika političke stranke. Predsjednica političke stranke Aiša Mehićević Dodik, koja je navedenim rješenjem upisana u registar, preminula je 13.06.2023. godine. Savez mladih snaga nakon toga nije dostavio ime osobe koja zastupa političku stranku.

Lice ovlašteno za finansijske izvještaje za 2022. godinu je Alma Hasanović i Alma Jašarević.

Prema podacima iz godišnjeg finansijskog izvještaja za 2022. godinu, Savez mladih snaga nema niže nivoe organizovanja.

3. OPIS PREGLEDA I KONTROLE FINANSIJSKOG IZVJEŠTAJA

Predmet pregleda i kontrole je godišnji finansijski izvještaj Saveza mladih snaga za 2022. godinu i finansijski izvještaj za period od dana podnošenja prijave za ovjeru za izbore do dana ovjere rezultata Općih izbora, održanih 2022. godine.

Cilj pregleda i kontrole je da revizor na bazi finansijskih izvještaja pokuša da ustanovi da li je politička stranka u izvještajnom periodu postupala u skladu sa odredbama Zakona o finansiranju političkih stranaka i odredbama člana 15.10 Izbornog zakona Bosne i Hercegovine. Ukoliko revizor na bazi kontrole finansijskog izvještaja utvrdi određena kršenja zakona, ocjenjuje da li je potrebno izvršiti reviziju u prostorijama stranke da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka.

Obim pregleda i kontrole finansijskih izvještaja Saveza mladih snaga obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskim izvještajima sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava, sa posebnim naglaskom na prihode iz budžeta. Obim pregleda i kontrole je bio ograničen iz razloga što stranka nije dostavila finansijsku dokumentaciju vezanu za utrošak sredstava.

4. PRETHODNE KONTROLE I REVIZIJE

Služba za reviziju je obavila pregled i kontrolu finansijskih izvještaja Saveza mladih snaga u periodu od 2018. godine do 2021. godine, nakon kojih su izdati izvještaji o pregledu sa mišljenjem revizora, nalazima i preporukama revizije. Politička stranka revizorima Službe za reviziju nije dozvolila da izvrše reviziju finansijskog izvještaja za 2019. godinu, odnosno uskratila je pristup svojim prostorijama, kao i uvid u njenu finansijsku dokumentaciju, pa je Centralna izborna komisija BiH svojom odlukom, broj: 05-1-07-6-1232/21 od 22.07.2022. godine izrekla administrativnu mjeru kojom se Savezu mladih snaga uskraćuje pravo da se kandiduje na narednim izborima.

Nakon izvršenog pregleda finansijskog izvještaja za 2021. godinu, izdat je izvještaj o pregledu sa mišljenjem revizora, nalazima i preporukama političkoj stranci: da program utroška sredstava donosi blagovremeno i na način da se obezbijedi potpuna transparentnost troškova, te da sredstva koristi u skladu sa programom utroška sredstava i isključivo za ostvarivanje ciljeva utvrđenih programom i statutom političke stranke, da se ne finansira iz zabranjenih izvora, da poslovne knjige vodi u skladu sa računovodstvenim propisima, da uspostavi potpune i tačne evidencije o novčanim tokovima, prihodima, rashodima i obavezama i da finansijske izvještaje popunjava i podnosi u skladu sa zakonom i podzakonskim aktima Centralne izborne komisije BiH.

Nerealizovane preporuke:

Na osnovu uočenih nedostataka u godišnjem finansijskom izvještaju za 2022. godinu, utvrđeno je da Savez mladih snaga nije ispoštovao date prepotuke.

5. NALAZI I PREPORUKE

5.1 NALAZI

a) Pregledom godišnjeg finansijskog izvještaja utvrđeno je da je Savez mladih snaga prekršio odredbe člana 4. stav (1) Zakona o finansiranju političkih stranaka¹.

Savez mladih snaga je u godišnjem finansijskom izvještaju iskazao ukupne troškove u iznosu od 30.292,13 KM, od čega troškove amortizacije u iznosu od 758,38 KM.

U korigovanom Planu prihoda i utroška sredstava za 2022. godinu politička stranka je planirala ukupne troškove u iznosu od 44.964,80 KM.

¹ U skladu sa odredbom iz člana 4. stav (1) Zakona o finansiranju političkih stranaka, stranka finansijska sredstva iz člana 3. stav (1) ovog Zakona može koristiti isključivo za ostvarivanje ciljeva utvrđenih svojim programom i statutom.

Analizom podataka iz korigovanog Plana prihoda i utroška sredstava za 2022. godinu i podataka iz godišnjeg finansijskog izvještaja za 2022. godinu, utvrđeno je da politička stranka nije planirala troškove kancelarijskog materijala i sitnog inventara, dok je u godišnjem finansijskom izvještaju iskazala troškove kancelarijskog materijala u iznosu od 10,50 KM, odnosno troškove sitnog inventara u iznosu od 311,85 KM.

Takođe, pregledom finansijskog izvještaja političke stranke i druge finansijske dokumentacije, nije utvrđeno da su sredstava u iznosu od 961,40 KM, koja su političkoj stranci uplaćena iz budžeta, utrošena za ostvarivanje stranačkih ciljeva.

Troškove prevoza, u iznosu od 961,40 KM, politička stranka je u poslovnim knjigama i finansijskom izvještaju evidentirala na osnovu gotovinskih isplata za gorivo. Prema podacima iz poslovnih knjiga, stranka nema zaposlena lica i nema vlastita vozila, a u toku pregleda finansijskog izvještaja, nije dostavila putne naloge i evidenciju o korištenju vozila (ko je koristio vozila, kada i u koju svrhu).

S obzirom da je Savez mladih snaga finansijska sredstva u iznosu od 322,35 KM ostvario mimo korigovanog Plana prihoda i utroška sredstava za 2022. godinu, te da za sredstva u iznosu od 961,40 KM, koja su političkoj stranci uplaćena iz budžeta, nije utvrđeno da su utrošena za ostvarivanje stranačkih ciljeva, prekršene su odredbe člana 4. stav (1) Zakona o finansiranju političkih stranaka.

b) Savez mladih snaga prekršio je odredbe člana 8. stav (1) Zakona o finansiranju političkih stranaka.²

- (1) Uvidom u akt Općine Stari Grad Sarajevo, broj: 07-11-19-46/23 od 07.03.2023. godine, koji je dostavljen Centralnoj izbornoj komisiji BiH, utvrđeno je da su budžetom Općine Stari Grad Sarajevo sredstva u iznosu od 14.879,00 KM planirana za političku stranku Savez za Stari Grad, te da se uplaćuju na transakcijski račun broj: 1610000200530051.

Kontrolom izvoda sa transakcijskog računa broj: 1610000200530051³, te poslovnih knjiga i finansijskog izvještaja, koji je Savez mladih snaga podnio Centralnoj izbornoj komisiji BiH, utvrđeno je da su budžetska sredstva Općine Stari Grad, koja su planirana i izdvojena za političku stranku Savez za Stari Grad, isplaćena političkoj stranci Savez mladih snaga.

- (2) Grad Sarajevo je u svom aktu, broj: 01/06-11-2235-1/2023 od 02.03.2023. godine, koji je dostavljen Centralnoj izbornoj komisiji BiH, naveo da su sredstva u iznosu od 13.442,90 KM, izdvojena za politički subjekt Savez mladih snaga.

Uvidom u izvode sa transakcijskog računa Saveza mladih snaga, utvrđeno je da su sredstva u iznosu od 12.292,90 KM uplaćena političkoj stranci, te da je politička stranka navedena sredstva u svom finansijskom izvještaju iskazala kao prihod iz budžeta Grada Sarajevo.

Na osnovu navedenog, a imajući u vidu činjenicu da politička stranka Savez mladih snaga nije, na Lokalnim izborima 2020. godine, osvojila mandate za navedene nivoe vlasti, politička stranka je ostvarila prihod u iznosu od 27.171,90 KM iz izvora koji su zabranjeni članom 8. stav (1) Zakona o finansiranju političkih stranaka.

c) Politička stranka je prekršila odredbe člana 11. stav (1) i člana 12. stav (1), stav (4) i stav (5) Zakona o finansiranju političkih stranaka.

Pregledom godišnjeg finansijskog izvještaja, finansijske dokumentacije koju je politička stranka dostavila na zahtjev Centralne izborne komisije BiH, te dokaza iz drugih izvora utvrđeno je da politička stranka poslovne knjige nije vodila u skladu sa računovodstvenim propisima, nije

² U skladu sa odredbom iz člana 8. stav (1) tačka a) Zakona o finansiranju političkih stranaka, finansiranje političkih stranaka zabranjuje se: organima uprave države BiH, entiteta, kantona, Brčko Distrikta BiH, te gradskim i općinskim organima.

³ Uvidom u Jedinstveni registar računa Centralne banke Bosne i Hercegovine za poslovnog subjekta Savez mladih snaga utvrđeno je da je transakcijski račun broj: 1610000200530051 glavni račun političke stranke Savez mladih snaga.

uspostavila potpune i pravilne evidencije o novčanim tokovima, prihodima, rashodima i obavezama, godišnji finansijski izvještaj nije popunila u skladu sa odredbama Pravilnika o godišnjim finansijskim izvještajima političkih stranaka (u daljnjem tekstu: Pravilnik) i nije dostavila dodatnu dokumentaciju, te je prekršila odredbe člana 11. stav (1) i člana 12. stav (1), stav (4) i stav (5) Zakona o finansiranju političkih stranaka.

- (1) Savez mladih snaga u finansijskom izvještaju nije prijavio tačan promet i stanje blagajne, čime je prekršio odredbe člana 12. Pravilnika.

Stranka je u poslovnim knjigama evidentirala sljedeći promet i stanje blagajne: početno stanje u iznosu od 4.113,27 KM, isplate iz blagajne u iznosu od 4.100,35 KM i stanje blagajne na dan 31.12.2022. godine u iznosu od 12,92 KM. U godišnjem finansijskom izvještaju stranka je iskazala početno stanje u blagajni u iznosu od 4.113,27 KM, isplate u iznosu od 4.113,27 KM i stanje na dan 31.12.2022. godine u iznosu od 0,00 KM.

- (2) Politička stranka nije uspostavila potpune i pravilne evidencije o prihodima iz budžeta, čime je prekršila odredbe člana 13. i 19. Pravilnika.

Sredstva koja su iz budžeta Općine Stari Grad Sarajevo i Grad Sarajevo isplaćena za finansiranje druge političke stranke, Savez mladih snaga je, suprotno odredbama člana 8. stav (1) Zakona o finansiranju političkih stranaka, u poslovnim knjigama i finansijskom izvještaju evidentirao kao svoj prihod iz budžeta u iznosu od 27.191,90 KM.

- (3) Savez mladih snaga nije u godišnjem finansijskom izvještaju iskazao tačne podatke o svojim troškovima, čime je prekršio odredbe člana 21. i 22. Pravilnika.

- U poslovnim knjigama Savez mladih snaga je evidentirao ukupne troškove u iznosu od 12.292,13 KM, dok je u finansijskom izvještaju koji je podnio Centralnoj izbornoj komisiji BiH iskazao troškove u iznosu od 30.292,13 KM.

Savez mladih snaga je u godišnjem finansijskom izvještaju iskazao troškove takse za prijavu za učešće na izborima u iznosu od 25.000,00 KM. Uvidom u poslovne knjige i raspoloživu dokumentaciju utvrđeno je da su troškovi takse iznosili 7.000,00 KM, čime je Savez mladih snaga u godišnjem finansijskom izvještaju iskazao troškove takse veće za 18.000,00 KM od ostvarenih.

- Politička stranka je u godišnjem finansijskom izvještaju iskazala troškove ispravke vrijednosti sitnog inventara u iznosu od 311,85 KM kao troškove amortizacije.
- Uvidom u poslovne knjige i finansijsku dokumentaciju utvrđeno je da politička stranka nije uspostavila sistem kojim bi obezbijedila transparentnost utroška sredstava, niti je poštovala odredbe Uredbe o uslovima i načinu plaćanja gotovim novcem FBiH.

Prema podacima iz poslovnih knjiga⁴, Savez mladih snaga je novcem iz blagajne platio knjigovodstvene usluge u iznosu od 3.000,00 KM, troškove prevoza u iznosu od 961,40 KM i ostale rashode u iznosu od 128,45 KM. Uvidom u poslovne knjige utvrđeno je da je Savez mladih snaga obaveze po računima za knjigovodstvene usluge u iznosima od po 250,00 KM mjesečno plaćao gotovim novcem, što je suprotno Uredbi o uslovima i načinu plaćanja gotovim novcem FBiH. Takođe, politička stranka je evidentirala stanje novčanih sredstava u blagajni u nepostojećim apoenima.

Politička stranka je u poslovnim knjigama, suprotno računovodstvenim propisima, troškove evidentirala u momentu plaćanja, odnosno račune za knjigovodstvene usluge, troškove prevoza i ostale rashode nije evidentirala na kontima obaveza prema dobavljačima, već direktno na konta troška a nakon isplate iz blagajne, tako da nije moguće utvrditi u kom iznosu su troškovi ostvareni i da li politička stranka ima neizmirenih obaveza.

⁴ Politička stranka u postupku pregleda finansijskog izvještaja nije dostavila blagajničku dokumentaciju.

Takođe, politička stranka, u poslovnim knjigama, po početnom stanju, ima evidentiranu preplatu prema dobavljaču BH Mobile u iznosu od 491,50 KM, što ukazuje da stranka nema potpune evidencije o svojim rashodima i obavezama.

- (4) U svrhu pregleda i kontrole finansijskog izvještaja od političke stranke je zatraženo da dostavi kopiju blagajničke dokumentacije (blagajnički dnevnik, naloge uplate i isplate, račune, odluke i slično) na osnovu koje je politička stranka izvršila isplatu gotovog novca iz blagajne, i u finansijskom izvještaju evidentirala troškove knjigovodstvenih usluga, troškove prevoza i ostale rashode.

Obzirom da politička stranka nije dostavila dokumentaciju na osnovu koje je izvršila gotovinske isplate iz blagajne u iznosu od 4.100,35 KM, prekršila je odredbe člana 12. stav (5) Zakona o finansiranju političkih stranaka.

d) Politička stranka prekršila je odredbe člana 12. stav (3) Zakona o finansiranju političkih stranaka i člana 15.1 stav (1) Izbornog zakona Bosne i Hercegovine.

Savez mladih snaga je postizborni finansijski izvještaj - Opći izbori 2022. godine dostavio nakon zakonom propisanog roka, čime je prekršio odredbe člana 12. stav (3) Zakona o finansiranju političkih stranaka i člana 15.1 stav (1) Izbornog zakona Bosne i Hercegovine.

Savez mladih snaga je postizborni finansijski izvještaj - Opći izbori 2022. godine (izvještajni period 01.05.-02.11.2022.), podnio putem Aplikacije FI CIK BiH i Centralnoj izbornoj komisiji Bosne i Hercegovine u čvrstoj kopiji dostavio dana 30.01.2023. godine.

Politička stranka je imala obavezu da postizborni finansijski izvještaj - Opći izbori 2022. godine dostavi do 02.12.2022. godine⁵.

e) Savez mladih snaga nije otvorio poseban transakcijski račun za finansiranje troškova izborne kampanje.

Savez mladih snaga nije otvorio poseban transakcijski račun za finansiranje troškova izborne kampanje.

Kao transakcijski račun koji je, u skladu sa odredbama člana 4.4 stav (1) Izbornog zakona BiH, bila obavezna otvoriti i namjenski koristiti za finansiranje troškova izborne kampanje, politička stranka je prijavila glavni transakcijski račun stranke broj: 1610000200530051 kod Raiffeisen banke d.d.

Taksu za ovjeru za učešće na Općim izborima 2022. godine, politička stranka je, suprotno Odluci o visini takse za ovjeru za učešće na Općim izborima 2022. godine, umjesto sa posebnog transakcijskog računa za finansiranje troškova izborne kampanje, platila sa glavnog računa stranke.

Troškovi izborne kampanje

Prema odredbama člana 15.10 Izbornog zakona BiH, politička stranka za potrebe izborne kampanje ne smije potrošiti više od 0,30 odnosno 0,20 KM⁶ po biraču u svakom izbornom krugu, prema broju birača koje je objavila Centralna izborna komisija BiH. Prema podacima Centralne izborne komisije BiH, Savez mladih snaga je u svrhu izborne kampanje mogao da potroši sredstva u iznosu od 1.214.078,90 KM.

Savez mladih snaga u godišnjem finansijskom izvještaju za 2022. godinu nije iskazao troškove propagande.

⁵ Član 15.1 Izbornog zakona BiH propisuje da politička stranka u roku od trideset dana od dana objavljivanja izbornih rezultata u Službenom glasniku BiH, podnosi finansijski izvještaj za period od dana podnošenja prijave za ovjeru za izbore do dana ovjere rezultata izbora.

⁶ Član 15.10 stav (2) Izbornog zakona BiH propisuje da se maksimalno dozvoljeni iznos za finansiranje izborne kampanje izračunava tako što se broj glasača u svim izbornim jedinicama u kojima politički subjekt ima kandidatsku listu ili kandidata pomnoži sa: 30 feninga za načelnika opštine odnosno gradonačelnika i za članove skupštine opštine, članove Narodne skupštine RS i Predstavničkog doma Parlamenta Federacije BiH, članove Parlamentarne skupštine BiH, člana Predsjedništva BiH, i predsjednika i potpredsjednike RS, odnosno 20 feninga za izbore za članove kantonalnih skupština.

5.2 PREPORUKE

Preporučuje se Savezu mladih snaga da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:

- *da sredstva koristi u skladu sa programom utroška sredstva i isključivo za ostvarivanje ciljeva utvrđenih programom i statutom političke stranke,*
- *da se ne finansira iz zabranjenih izvora,*
- *da poslovne knjige vodi u skladu sa računovodstvenim propisima, odnosno da uspostavi potpune i tačne evidencije o novčanim tokovima, prihodima, rashodima i obavezama,*
- *da finansijske izvještaje koje podnosi Centralnoj izbornoj komisiji Bosne i Hercegovine dostavlja u zakonom propisanim rokovima i na način utvrđen Pravilnikom o godišnjim finansijskim izvještajima političkih stranaka i Pravilnikom o predizbornim i postizbornim finansijskim izvještajima političkih stranaka i*
- *da poštuje odredbe Izbornog zakona BiH i podzakonskog akta Centralne izborne komisije Bosne i Hercegovine, kojim se uređuje otvaranje namjenskog računa i njegovo korištenje isključivo za finansiranje izborne kampanje.*

Političkoj stranci se posebno skreće pažnja i preporučuje da svoje poslovanje uskladi sa važećim finansijskim propisima, odnosno Uredbom o uslovima i načinu plaćanja gotovim novcem.

KOMENTAR:

U ostavljenom roku, Savez mladih snaga nije dostavio primjedbe na mišljenje revizora i nalaze revizije date u Preliminarnom izvještaju o pregledu godišnjeg finansijskog izvještaja za 2022. godinu.

Šef Odsjeka za revizijske poslove

Sanja Tošović

Revizor

Tanja Golijanin